

«Elecziuns USA»

Observaziun cuminaivla dals cussegls dal public SRG SSR davart ils rapports da las elecziuns primaras a la televisiun

■ **Sco mintg'onn han fatg ils tschintg cussegls dal public da la SRG (SRG.D, RTSR, Corsi, SRG.R e Swissinfo) ina observaziun cuminaivla. Questa giada ha ella regardà ils rapports da la televisiun avant las elecziuns presidenzialas dals Stadis unids da l'America 2016.** Ils cussegls dal public han stimà la buna qualitad dal program da la SSR. En vista a la ferma persunalisaziun dal cumbat electoral prestan ils emetturs da la SSR cun lur rapports objectivs ina lavur excellenta. Da discutir han dà las infurmaziuns da profundaziun per part mancantas davart il sistem electoral american ed ils accents centrals dals candidats per il presidi. Ils cussegls dal public recumondan da cumpletter il dossier online cun talas infurmaziuns, per porscher al public in ulteriur surpli da valor.

Ils emetturs da la SSR che produceschan en quatter linguas possedan considerablamain pli paucas resursas che lur concurrenza estra. En pli èn las dimensiuns dal mund da las medias svizzer betg da cumparegliar cun auters pajais che rapportan da las elecziuns presidenzialas en ils Stadis unids da l'America. En discussiun cun *Reto Ceschi*, il responsabel da la partiziun infurmaziun da RSI e *Gregor Meier*, il schef da novitads e suppleant dal chauradactur da SRF, ha perquai constatà la gruppa da lavur naziunala dals presidis dals cussegls dal public che la SSR fetschia gist er en la cumparegliaziun internaziunala ina lavur da fitg buna qualitad.

Infurmaziuns davart il sistem electoral complex e las sfidas futuras
Ils cussegls dal public recumondan da furnir durant las elecziuns primaras en ils formats da novitads, sper ils blocs curts cun actualitads dal di, er infurmaziuns da profundaziun, da metter ac-



Ils tschintg cussegls dal public han examinà ils rapports da la televisiun avant las elecziuns presidenzialas dals Stadis unids da l'America. Els han stimà la buna qualitad dal program da la SSR.

FOTO M. HARTMANN

cents e da reflectar criticamain davart singulas contribuziuns. Quai sco cuntrapol a l'emoziunalisaziun e persunalisaziun dal cumbat electoral. Infurmaziuns regularas davart il modus da las elecziuns u davart las differenzas cun l'Europa e la Svizra, sco er l'impurtanza da las elecziuns presidenzialas per la vita dadens ed er dador ils Stadis unids fissan gidaivlas. Cuntrari a la televisiun ch'è fitg dependenta da maletgs expressivs, porscha l'internet la pussaivladad da dumandar giu infurmaziuns tenor basegn. Perquai fiss in dossier online davart il sistem electoral, las pusiziuns ed ils programs dals candidats, las sfidas futuras e las differenzas cun la Svizra gidavel. Dentant stuess cunzunt tar la pagina-web da SRF vegnir optimada la funcziun da tschertga. Tar ils rapports da la televisiun RTSR vegni constatà che memia paucas expertas ed experts vegnan a pled, schebain ch'ins chattass

p.ex. a Geneva superdelegads cun dretg d'eleger.

En discussiun cun ils producents da program èsi vegnì relativà che l'observaziun sa restrenscha a la perioda da zerc-ladur fin settember 2016 ed a las emissiuns d'infurmaziun da tv regularas durant las elecziuns primaras. Cuntrari a l'observaziun da las emissiuns da SRF, RTS, RSI è il cussegl dal public da RTR sa concentrà sin las emissiuns da radio e tar Swissinfo sin diesch contribuziuns d'internet. Reto Ceschi e Gregor Meier accentueschan che profundaziuns ed infurmaziuns da basa en differents formats d'emissiun vegnan furnidas da tuts trais vecturs radio, televisiun ed internet, sur in temp pli lung. Las davosas emnas avant l'elecziun vegnan ils accents anc approfondads cun documentaziuns pli lungas. Ils rapports davart las elecziuns presidenzialas dals Stadis unids da l'America s'extendan sur in

mez onn, perquai pon ins far in facit cumplet pir suenter ils 8 da november. Ils cussegls dal public constatan che varsaquantas contribuziuns da profundaziun excellentas èn vegnidadas emessas l'atun. Tar RTR han ins stimà cunzunt ils purtrets da persunas emigradas. Cun las intervistas èn rivadas «vuschs dals Stadis unids» en las stivas da la Svizra rumantscha.

Concentraziun da las competenzas regionalas

En connex cun emissiuns da la SSR vegn tematisada regularmain la collavuraziun tranter las regiuns linguisticas. Quella funcziun fitg bain, sco ch'i constatescha er Gregor Meier. Tar las elecziuns dals Stadis unids da l'America l'onn 2008 han ils correspundents al lieu a Chicago gia collavurà stretgamain, cun parter persunal da camera e barattar singulas contribuziuns. Tenor Reto Ceschi

è la sfida dad oz che la pressiu sin las redacziuns crescha ed i vegnan pretendidas pli e pli uschenumnadas distribuziuns duplex (commentaris directamain dal lieu cun stimaziun) per l'atgna regiun linguistica. Tuttina recumondan ils cussegls dal public sco mesira da svilup da collavurar pli ferm cunzunt tar ils dossiers online e da porscher fatgs fundamentals e rapports complementars davart la situaziun en ils Stadis unids sin las plattafurmas d'internet respectivas sco part da servetsch. Er pudess ins sa derasar pli ferm al lieu e realisar uschia purtrets interessants. I sa tracta er da parter pli ferm las diversas competenzas ed emissiuns d'enfin qua, sper il barat da las actualitads dal di tranter las redacziuns.

«La trumpisaziun da las medias»

Ils participants a la discussiun èn d'accord che l'impurtanza da social media e l'emoziunalisaziun e persunalisaziun dal cumbat electoral che resultan èn creschidas. Las medias tradiziunalas vegnan sut squitsch. SRF ha discutà en il davos club da medias da l'avust il fenomen da la «trumpisaziun da las medias». Quella furma dal «club da medias» è enconuschenta displaschaivlamain mo en Svizra tudestga. Ils cussegls dal public èn d'accord che la discussiun critica envers las medias tutga vitiers. Ils programs da la SSR en tut las regiuns linguisticas duessan mussar er quel nivel en lur emissiuns e sa fatschentar criticamain cun la lavur da las medias. Ils responsabels per il program èn conscients da quella prentensiun e da la responsabladad da rapportar a moda objectiva, neutrala e da buna qualitad.

Gruppa da lavur dals presidents dals cussegls dal public SRG SSR